

16/05/2024

Aizawl

1830 Hrs

REGIONAL NEWS

HEADLINES:-

1. India Sorkarin Indo-Burma border hung a tum leh Free Movement Regime hlih a tum duhloh lantir nan vawiin khan ZORO General Headquarters bultumin Zokhawthar, Vaphai khua leh Tengnopal District Manipurah kawngzawh a ni.
2. Rampum huap Dengue Do na ni- National Dengue Day chu Health & Family Welfare hnuai National Vector Borne Disease Control Programme (NVBDCP) huaihawtin vawiin khan hman a ni.
3. Lok Sabha inthlanpui atan ngawrh takin political party te an campaign chhunzawm mek
4. Odisha inthlan campaign-naa tharum thawhna thlengah BJP worker pakhat a thi a, midang 8 in hliam an tuar.

<><><>

ZORO PEACEFUL RALLY

India Sorkarin Indo-Burma border hung a tum leh Free Movement Regime (FMR) hlih a tum duhloh lantir nan vawiin khan ZORO General Headquarters bultumin Zokhawthar, Vaphai khua leh Tengnopal District Manipurah kawngzawh a ni.

Vaphai khuaah hian VC kaihruaina in zing dar 7:00-ah hun hman a ni a, ZORO General Headquarters Vice President Pu Rohmingthanga Kawlni leh YMA aiawh, VC aiawh leh MUP aiawh ten thu an sawi a ni. Vaphai khuaa hun hmannaah hian Vaphai leh khaw thenawm atangin mipui thahnem tak an pungkawm a ni.

Vawiin vek hian Manipur Tengnopal District-ah ZORO General Headquarters buatsaihin hman a ni a, Manipur a hmanna hi Kuki Inpi leh Kuki Students' Organisation in an buaipui a ni. Tengnopal District-ah ramri hung duhlo tu leh Free Movement Regime thiah duhlo mipui thahnem tak an pungkawm a. Duhlohna thu te tarin, kawng an zawh a ni.

Vawiin vek hian Lunglei ZORO Division Headquarters-ah pawh hun hman a ni bawk e.

Zokhawthar Burma Border-ah hman a ni bawk a, he hun hi Pu Michael Lalramsanga, ZORO Thalai President-in a kaihruai a ni. Zokhawthar leh a chhehvel khua mipui thahnem tak an pungkawm a, Burma lam Khawmawi khua leh a chhehvel mipui thahnem takin an rawn tawiawm bawk a ni.

He huna thusawitu ZORO President Pu R. Sangkawia chuan, ZORO in a buatsaih Border fencing leh Free Movement Regime (FMR) hlih duh loh lantirna a buatsaih chu pawl mal hmalakna mai a ni lova, hnam Issue tak tak a ni a, Zofa zawng zawng hmalakna a ni a ti a. UN Declaration on the rights of Indegenous Peoples 2007 Article ah chuan, 'Tualto hnamte a bik takin khawvel sorkar ramri khamin a thendarh te chu an inkawlpawhin an intanpui anga, Sakhaw thil leh khawtlang thil, ei leh bar leh politics-ah te anmahni mi leh sa te nen inpawh a, sawiho theihna dikna chanvo an nei a ni a ti a. Ram roreltute chuan tualto hnam te nena inbe rawnin he dikna chanvo te hi tipuitling tuirn hman an la ang,' a ti. He dan pass a nih lai hian India chuan a duhlo lama

vote a pe a, tunah erawh a kalh zawngin hmalak a tum chu an hrethiam theih lova. Border fencing a tum leh FMR hlih a tum hi an dodal zel dawn a ni. a ti.

He huna thusawitu dang ZORO Gen.hqrs.Vice President Pu Lalmuanpuia Punte MLA chuan Tiau lui leh chhaka awm unaute hi daidan theih an ni lova, British sawrkarin a phuahchawp ram ri tingheta, pawmpui tura British duhlotu India Sawrkarin hma a la chu an duh lo a ni, a ti a. India sawrkar hmalakna Mizorama pawl zawng zawngin an duh lova, Mizoram Assembly House ah pawh an duh lohna pass a, hemi lantir nan hian political party hrang hrang aiawhte pawh he hunah hian an tel a ni a ti.

ZORO General Secretary Pu L. Ramdinliana Renthlei chuan, Zofate thendarhkan nih tirh a an rilru a cham reng chu insuihkhawm leha, rorelna pakhat hnuai awm a ni a, chu an beisei an nghah mek laiin India Sorkar chuan ramri hung a tum a, zalen taka kan inkalpawhna FMR hlih a tum bawk a, hei hi a tawp thleng an dodal dawn a ni a ti.

Zokhawthar peaceful rally-ah hian Bialtu MLA Pu Clement Lalhmingthanga, Pu Lalmuanpuia Punte MLA, Sub-Headquarters YMA Champhai, Zokhawthar khawtlang hruaitu aiawh, Hualngo Peoles Organisation aiawh leh Political Party hrang hrang aiawh ten thu an sawi bawk a. Thusawitu hrang hrang hian hnam inpumkhatna thute, Border fencing leh FRM hlih an duh loh thute leh an dodal zel tur thute an sawi hlawm a ni.

<><><>

CM

Chief Minister Pu Lalduhoma chuan vawiin khan a pisaah State Bank of India Managing Director, Chief General Manager Pu Vincent leh a thawhpuite a kawm a. Mizorama State Bank of India te hmalakna chungchang leh Hand Holding Policy kalpuina kawnga thawh dun theihna tur te a sawipui.

Chief Minister hian, SBI Credit Deposit Ratio India ram huapa chawhrual 76 a nih reng theih laia Mizoram bik 46 emaw vel chauh a ni thin chu a ngaimawh hle tih a hrilh a. Hei hi mipuite sum deposit tlingkhawm te state tan hman tangkai a ni tawk lo tihna a ni. CD Ratio sang zawk neihpui ngei turin a beisei tlat a ni, a ti.

Chief Minister chuan SBI Sponsor bank, Mizoram Rural Bank a thawktu indaih lo leh Allowances tlem bik an dawng nia sawi te lo enchiang turin Chief General Manager hi a chah bawk.

Bank kaltlanga Central Scheme kalpui hrang hrang chungchang pawh a sawipui a. Heng Central Scheme awm mek te leh Mizoram sawrkar Hand Holding Policy te chu kal kawptir tura hmalak mek a nih thu te, chumi atana Bank leh Mizoram sawrkar thawh dun dan turte an rel a ni.

Chief Minister chuan, tun hmain Central Scheme loan te chu a dawngtuten hlawhtlin tum vang pawh ni lovin subsidy emaw margin money emaw an duh vang maiin an dil fo thin a. An sawrkarah erawh chutiang mite tan chuan beisei a remchang tawh dawn lo a ti a. Hand Holding Policy nen kaikawpin; kan khaichhuah turte pawh Beneficiary

ti tawh lovin Partner -thawhpui an ti tawh dawn a. A hlawhtling tur te chauh thawhpui an tum dawn a ni, a ti.

Chief Minister hi Pi R. Lalrodinga, OSD to CM, Pu Jonathan Lalremruata, OSD to CM, Pu LP Lalchangkima, Chairman & MD, ZIDCO ten an tawiawm a ni.

<><><>

3 ARRESTED IN MMFSL CASE

Cheng vbc. 150 chuang tihchingpen thubuai ah Mahindra & Mahindra Financial Service Ltd (MMFSL) Circle Head Ankit Badree - an Aizawl Police Station - a FIR a thehluk bawhzuiin Mizoram Police Special Investigation TEAM (SIT) ten nimin khan mi 3 an man belh.

MMFSL Area Manager Jakir Hussain leh a thawhpui mi 10 te chu April ni 25khan man an lo ni tawha, nimin piah khan mi 1 man a nih hnuah mi 3 dang nimin man belh an nih thu DIG (CID) Pu Lalhuliana Fanai chuan a sawi.

Heng mi 3 man belh te hi Rafael Nissan dealer Pu George S. Thoite, Salem Veng; Aidu Motors (Renault) dealer, Madhurjya Sharmah, Salem Veng leh National Business Enterprise (TATA) dealer Paul Zothanpuia John, Khatla te an ni.

<><><>

NATIONAL DENGUE DAY

Rampum huap Dengue Do na ni- National Dengue Day chu Health & Family Welfare hnuai National Vector Borne Disease Control Programme (NVBDCP) chuan vawiin khan an hmang a.

MINECO Khatlaa ATI Auditoriumah NVBDCP, Mizoram huaihawtin Aizawl Municipal Corporation huam chung veng 166 atanga Local Council member te nen Dengue natna chungchang inzirtirna leh Dengue pung zel tur ven nana khawtlang mipui nena thawhho dan tur chungchang an zir ho a ni.

Health Services Director Dr. Lalremmawii chuan Local Council member te chu Dengue dona kawnga mipui zirtirtu, ngenna leh hriattirna pe theitu an nih angin an zirlai zirte khawtlang tana hmang tangkai theuh turin a chah a ni.

World Dengue Day ni hi Mizorama District hrang hrang pawh hman niin, TV, Chanchinbu lamah te mipui zirtirna tih chhuah a nih bakah School, Kohhran, Khawtlang leh pawl hrang hrang te nen hlawk taka hun hman ho a ni bawk.

Kum 2024 National Dengue Day thupui chu, “DENGUE TIREM TUR A KHAWTLANG NEN A THAWHHO” tih a ni.

Champhai ah pawh National Dengue Day pual hian Govt. Ruantlang High School - ah National Centre for Vector Borne Diseases Control (NCVBDC) buatsaihin hun hman a ni a.

Senior Chief Medical Officer Dr. PC Lalhminglana chuan National Dengue Day hman a nih chhan sawifiahin, Champhai District chu Dengue natna buaipui ngaihna district a la nih vat a rin thu leh tun dinhmunah a vei finfiah an la tam loh thu sawiin dengue dolet tura fimkhur taka hmalak leh inhrilhhriatna neih a pawimawh thu a sawi.

Hemi hnu hian khawlaiah Dengue chungchang inzirtirna poster-te tar niin Local Cable TV lamah Dengue chungchang zirtirna thuziak leh video-te chhuah a ni. Hei bakah hian Undivided Champhai District huamchhunga khaw hrang hranga PHC ah te Awareness Campaign leh Thosi pian theihna tui tling tih bo hnatlangte neiin hun hman a ni.

<><><>

DIST JAIL HEALTH CAMP

Central leh Sorkar hmalaknaa kumin chhunga Mizoram a TB um bo a nih theih nan Central TB Division leh development partner hrang hrang ten hmala chhunzawmin vawiin khan Aizawl District Jail-ah Health Camp an buatsaih a, District Jail - a thawktu leh awm mek mi 76 - te en dik niin naktuk ah chhunzawm leh a ni ang.

He Project in a tum ber chu Mizorama TB vei la hriat chhuah lohte a tam thei ang ber hriat chhuah a, damdawi leh enkawl na tha pek a ni a. Khawl thar leh thiamna hmanga khaw hrang hranga Health Camp nei tura hmalak chhoh tan a ni.

Mizoramah TB vei hi kum tin mi 2,000 chuang hmuh chhuah ziah anga chhut a ni a. Nikum chung khan Mizoram chhungah mi 108 TB vangin an thi a, kumin January leh March thla inkar chung khan TB vei mi 595 hmuh chhuah an ni tawh bawk.

<><><>

LOK SABHA CAMPAIGN

Lok Sabha inthlanpui atan ngawrh takin political party te an campaign chhunzawm mek a. Inthlan thawh nga na atana campaign hi tunkar Inrinni hian a tawp dawn a ni.

Vawiin khan Uttar Pradesh ah political party hrang hrang star campaigner ten voter te rilru hneh tumin theihtawp an chhuah a. Prime Minister leh Senior BJP leader Narendra Modia chuan Jaunpur-a a campaignnaah CAA chu a thutiam hlawhtlinna lantirtu a ni tih sawiin BJP chuan an thutiam an hlen zel a ni a ti.

Hetihlai hian Congress hruaitu Priyanka Gandhi Vadra chuan Raebareli-a a campaignnaah BJP chu beiin an party chuan dan pawisaklohna an thehdarh a ti a. Samajwadi Party hruaitu Akhilesh Yadav pawhin BJP beiin State leh Central sawrkar chu eiruknaah an inhnimphum thuk hle a ni a ti.

<><><>

ODISHA VIOLENCE

Odisha inthlan campaign-naa tharum thawhna thlengah BJP worker pakhat a thi a, midang 8 in hliam an tuar. Odisha hian Lok Sabha inthlan thawh thum la awm leh state assembly inthlan an hmachhawn mek a. BJP, Congress leh BJD hruaituten hmun hrang hrangah an party candidate te tan an campaign a.

Vawiin khan Ganjam district-a sawrkar lai BJD leh BJP mi leh sa te inkara buaina chhuakah BJP worker pakhat a thi a. Midang 7 in hliam an tuar. Thudawn danin tharum thawhna hmun hi Aska Parliamentary constituency chhunga Sri Krushna Sarangpur khuaah a ni a. Hliam tuarte hi sawrkar damdawiinah lak nghal an ni a, Police te chuan mi pariat an man tawh a ni.

Ganjam district ah vek hian party pahnih inepna thlengah silai hmehpuah niin mi pakhat na takin a hliam a. Electioni Commission chuan Ganjam collector chu a tul anga hmala turin a hriattir a ni.

<><><>

SLOVAK PM SHOT

Slovakia Prime Minister Robert Fico chu an silaia kah anih avangin thichhawngin a awm mek. Prime Fico hi an ramchhung hmarchhak Bratislava-a khaw pakhatah kah a ni a. Defence Minister Robert Kalinak chuan Pu Fico hi darkar thum chung zai anih thu sawiin a dinhmun a tha lo hle a ti a. Deputy Prime Minister Tomas Taraba sawidanin kum 59-a upa Prime Minister Fico hi tun dinhmunah thih hlauhawm erawh a ni lo a ti thung.

Slovakia-a politician langsar tak takte chuan an Prime Minister beih a ni chu mipui roelna democracy beihna a ni an ti a. US President Joe Biden-a pawhin Pu Fico kah a ni chu pawh a tih takzet thu a sawi a ni. Thudawn danin pawikhawihtu nia puh hi man a ni tawh a. A nihna erawh puanzar ala ni lo a ni.

<><><>